

वक्रतुण्ड महाकाय सूर्य कोटि सम प्रभ  
निर्विघ्नं कुरु मे देव सर्व कार्येषु सर्वदा ॥  
विघ्नेश्वराय वरदाय सुरप्रियाय  
लम्बोदराय सकलाय जगद्हिताय  
नागाननाय श्रुतियग्न विभूशिताय  
गौरीसुताय गणनाथ नमो नमस्ते  
ॐ श्री परमात्मने नमः

प्रणवउँ पवन कुमार खल बन पावक ग्यान धन ।  
जासु हृदय आगार बसहिं राम सर चाप धर ॥

ॐ बलि बाँधत प्रभु बाढेउ सो तनु बरनि न जाइ ।  
उभय धरी महँ दीन्ही सात प्रदच्छिन धाई ॥ २९

ॐ अंगद कहइ जाऊँ मै पारा । जियँ संसय कळु फिरती बारा ॥  
जामवंत कह तुम सब लायक । पठइअ किमि सबही कर नायक ॥  
कहइ रीछपति सुनु हनुमाना । का चुप साधि रहेहु बलवाना ॥  
पवन तनय बल पवन समाना । बुद्धि बिबेक बिग्यान निधाना ॥  
कवन सो काज कठिन जग माही । जो नहिं होइ तात तुम पाही ॥  
राम काज लागि तव अवतारा । सुनतहिं भयउ पर्वताकारा ॥  
कनक बरन तन तेज बिराजा । मानहुँ अपर गिरिन्ह कर राजा ॥  
सिंहनाद करि बारहिं बारा । लीलहिं नाघउँ जलनिधि खारा ॥  
सहित सहाय रावनहि मारी । आनउँ इहाँ त्रिकूट उपारी ॥  
जामवंत मै पूँछउँ तोही । उचित सिखावनु दीजहु मोही ॥  
एतना करहु तात तुम्ह जाई । सीतहि देखि कहहु सुधि आई ॥  
तब निज भुज बल राजिवनैना । कौतुक लागि संग कपि सेना ॥

ॐ कपि सेन संग सँघारि निसिचर रामु सीतहि आनिहै ।  
त्रैलोक पावन सुजसु सुर मुनि नारदादि बखानिहै ॥  
जो सुनत गावत कहत समुझत परम पद नर पावई ।  
रघुबीर पद पाथोज मधुकर दास तुलसी गावई ॥

ॐ भवभेषज रघुनाथ जसु सुनहिं जे नर अरु नारि ।  
तिन्ह कर सकल मनोरथ सिद्ध कररि त्रिसिरारि ॥ ३० (क)

ॐ नीलोत्पल तन स्याम काम कोटि शोभा अधिक ।  
सुनिअ तासु गुन ग्राम जासु नाम अघ खग बधिक ॥३० (ख)

### सुन्दर काण्ड

शान्तं शाश्वतमप्रमेयमनघं निर्वाणशान्तिप्रदं  
ब्रह्माशम्भुफणीन्द्रसेव्यमनिशं वेदान्तवेद्यं विभुं ।  
रामाख्यं जगदीश्वरं सुरगुरुं मायामनुष्यं हरिं  
वन्देहं करुणाकरं रघुवरं भूपालचूडामणिम् ॥ १ ॥  
नान्या स्पृहा रघुपते हृदयेस्मदीये  
सत्यं वदामि च भवानखिलान्तरात्मा ।  
भक्तिं प्रयच्छ रघुपुंगव निर्भरां मे  
कामादिदोषरहितं कुरु मानसं च ॥ २ ॥  
अतुलितबलधामं हेमशैलाभदेहं  
दनुजवनकृशानुं ज्ञानिनामग्रगण्यम् ।  
सकलगुणनिधानं वानराणामधीशं  
रघुपतिप्रियभक्तं वातजातं नमामि ॥ ३ ॥

ॐ जामवंत के वचन सुहाए । सुनि हनुमंत हृदय अति भाए ॥  
तब लागि मोहि परिखेउ तुम्ह भाई । सहि दुख कंद मूल फल खाई ॥  
जब लागि आवौ सीतहि देखी । होइहि काजु मोहि हरष बिसेषी ॥  
यह कहि नाइ सबन्हि कहुं माता । चलेउ हरषि हियँ धरि रघुनाथा ॥  
सिंधु तीर एक भूदर सुन्दर । कौतुक कूदि चढेउ ता ऊपर ॥  
बार बार रघुबीर सँभारि । तरकेउ पवन तनय बल भारी ॥  
जेहिं गिरि चरन देइ हनुमंता । चलेउ सो गा पाताल तुरंता ॥  
जिमि अमोघ रघुपति कर बाना । एही भाँति चलेउ हनुमाना ॥  
जलनिधि रघुपति दूत बिचारी । तै मैनाक होहि श्रमहारि ॥

ॐ हनूमान तेहि परसा कर पुनि कीन्ह प्रनाम ।  
राम काजु कीन्हें बिनु मोहि कहाँ विश्राम ॥ १ ॥

ॐ जात पवनसुत देवन्ह देखा । जानै कहुँ बल बुद्धि बिसेषा ॥  
सुरसा नाम अहिन्ह कै माता । पठइन्हि आइ कही तेहिं बाता ॥  
आजु सुरन्ह मोहि दीन्ह अहारा । सुनत बचन कह पवनकुमारा ॥  
राम काजु करि फिरि मै आवौ । सीता कइ सुधि प्रभुहि सुनावौ ॥  
तब तब बदन पैठिहउँ आई । सत्य कहउँ मोहि जान दे माई ॥  
कवनेहुँ जतन देइ नहिं जाना । ग्रससि न मोहि कहेउ हनुमाना ॥  
जो जन भरि तेहिं बदनु पसारा । कपि तनु कीन्ह दुगुन बिस्तारा ॥  
सोरह जोजनमुख तेहिं ठयऊ । तुरत पवनसुत बतिस भयऊ ॥  
जस जस सुरसा बदनु बढावा । तासु दून कपि रूप देखावा ॥  
सत जो जन तेहि आनन कीन्हा । अति लघु रूप पवनसुत लीन्हा ॥  
बदन पइठि पुनि बाहेर आवा । मागा बिदा ताहि सिरु नावा ॥  
मोहि सुरन्ह जेहि लागि पठावा । बुधि बल मरमु तोर मै पावा ॥

ॐ राम काजु सब करिहहु तुम्ह बल बुद्धि निधान ।  
आसिष देइ गई सो हरषि चलेउ हनुमान ॥ २ ॥

ॐ निशिचरि एक सिंधु महुँ रहई । करि माया नभु के खग गहई ॥  
जीव जंतु जे गगन उडाहीं । जल बिलोकि तिन्ह कै परिछाहीं ॥  
गहइ छाहँ सक सो न उडाई । एहि बिधि सदा गगनचर खाई ॥  
सोइ छल हनूमान कह कीन्हा । तासु कपटु कपि तुरतहिं चीन्हा ॥  
ताहि मारि मारुत सुत बीरा । बारिधि पार गयउ मतिधीरा ॥  
तहाँ जाइ देखि बन सोभा । गुंजत चंचरीक मधु लोभा ॥  
नाना तरु फल फूल सुहाए । खग मृग बृंद देखि मन भाए ॥  
सैल बिसाल देखि एक आगें । ता पर धाइ चढेउ भय त्यागें ॥  
उमा न कछु कपि कै अधिकाई । प्रभु प्रताप जो कालहि खाई ॥  
गिरि पर चढि लंका तेहिं देखी । कहि न जाइ अति दुर्ग बिसेषी ॥  
अति उतंग जलनिधि चहु पासा । कनक कोट कर परम प्रकासा ॥

७ कनक कोट बिचित्र मनि कृत सुंदरायतना घना ।  
 चडु हट्ट हट्ट सुबट्ट बीथी चारु पुर बहु बिधि बना ॥  
 गज बाजि खच्चर निकर पदचर रथ बरूथन्हि को गनै ।  
 बहुरूप निसिचर जूथ अतिबल सेन बरनत नहिं बनै ॥ १ ॥  
 बन बाग उपवन बाटिका सर कूप बापी सोहही ।  
 नर नाग सुर गंधर्ब कन्या रूप मुनि मन मोहही ॥  
 कहूँ माल देह बिसाल सैल समान अतिबल गर्जही ।  
 नाना अखारेन्ह भिरहिं बहुबिधि एक एकन्ह तर्जही ॥ २ ॥  
 करि जतन भट कोटिन्ह बिकट तन नगर चहुँ दिसि रच्छही ।  
 कहूँ महिष मानुष धेनु खर अज खल निसाचर भच्छहिं ॥  
 एहि लागि तुलसीदास इन्ह की कथा कछु एक है कही ।  
 रघुबीर सर तीरथ सरीरन्हि त्यागि गति पैहहिं सही ॥ ३ ॥

८ पुर रखवारे देखि बहु कपि मन कीन्ह बिचार ।  
 अति लघु रूप धरौ निसि नगर करौ पइसार ॥ ३ ॥

९ मसक समान रूप कपि धरी । लंकहि चलेउ सुमिरि नरहरी ॥  
 नाम लंकिनी एक निसिचरी । सो कह चलेसि मोहि निंदरी ॥  
 जानेहि नहीं मरमु सठ मोरा । मोर अहार जहाँ लागि चोरा ॥  
 मुठिका एक महाकपि हनी । रुधिर बमत धरनी ढनमनी ॥  
 पुनी संभारि उठी सो लंका । जोरि पानि कर विनय ससंका ॥  
 जब रावनहि ब्रह्म बर दीन्हा । चलत बिरंचि कहा मोहि चीन्हा ॥  
 बिकल होसि तै कपि के मारे । तब जानेसु निसिचर संघारे ॥  
 तात मोर अति पुन्य बहूता । देखेउँ नयन राम कर दूता ॥

१० तात स्वर्ग अपवर्ग सुख धरिअ तुला एक अंग ।  
 तूल न ताहि सकल मिलि जो सुख लव सतसंग ॥ ४ ॥

११ प्रबिसि नगर कीजे सब काजा । हृदय राखि कोसलपुर राजा ॥  
 गरल सुधा रिपु करहिं मिताई । गोपद सिंधु अनल सितलाई ॥  
 गरुड सुमेरु रेनु सम ताही । राम कृपा करि चितवा जाही ॥

अति लघु रूप धरेउ हनुमाना । पैठा नगर सुमिरि भगवाना ॥  
मंदिर मंदिर प्रति करि सोधा । देखे जहँ तहँ अगनित जोधा ॥  
गयउ दसानन मंदिर माहीं । अति बिचित्र कहि जात सो नाहीं ॥  
सयन किएँ देखा कपि तेही । मंदिर महँ न दीखि बैदेही ॥  
भवन एक पुनि दीख सुहावा । हरि मंदिर तहँ भिन्न बनावा ॥

ॐ रामायुध अंकित गृह सोभा बरनि न जाइ ।  
नव तुलसिका बृंद तहँ देखि हरष कपिराइ ॥ ५ ॥

ॐ लंका निसिचर निकर निवासा । इहाँ कहाँ सज्जन कर बासा ॥  
मन महँ तरक करै कपि लागा । तेहीं समय बिभीषनु जागा ॥  
राम राम तेहिं सुमिरन कीन्हा । हृदय हरष कपि सज्जन चीन्हा ॥  
एहि सन हठि करिहउँ पहिचानी । साधु ते होइ न कारज हानी ॥  
बिप्र रूप धरि बचन सुनाए । सुनत बिभीषन उठि तहँ आए ॥  
करि प्रनाम पूँछी कुसलाई । बिप्र कहहु निज कथा बुझाई ॥  
की तुम्ह हरि दासन्ह महँ कोई । मोरें हृदय प्रीति अति होई ॥  
की तुम्ह राम दीन अनुरागी । आयहु मोहि करन बड भागी ॥

ॐ तब हनुमन्त कही सब राम कथा निज नाम ।  
सुनत जुगल तन पुलक मन मगन सुमिरि गुन ग्राम ॥ ६ ॥

ॐ सुनहु पवनसुत रहनि हमारी । जिमि दसनन्हि महँ जीभ बिचारी ॥  
तात कबहुँ महि जानि अनाथा । करिहहिं कृपा भानुकुल नाथा ॥  
तामस तनु कछु साधन नाहीं । प्रीति न पद सरोज मन माहीं ॥  
अब मोहि भा भरोस हनुमंता । बिनु हरि कृपा मिलहि नहिं संता ॥  
जौ रघुबीर अनुग्रह कीन्हा । तौ तुम मोहि दरसु हठि दीन्हा ॥  
सुनहु बिभीषन प्रभु कै रीती । करहिं सदा सेवक पर प्रीति ॥  
कहहु कवन मै परम कुलीना । कपि चंचल सबहीं बिधि हीना ॥  
प्रात लेइ जो नाम हमारा । तेहि दिन ताहि न मिलै अहारा ॥

ॐ अस मै अधम सखा सुनु मोहू पर रघुबीर ।  
कीन्ही कृपा सुमिरि गुन भरे बिलोचन नीर ॥ ७ ॥

चौ जानतहूँ अस स्यामि बिसारी । फिरहिं ते काहे न होहिं दुखारि ॥  
एहि बिधि कहत राम गुन ग्रामा । पावा अनिर्वाच्य विश्रामा ॥  
पुनि सब कथा बिभीषन कही । जेहि बिधि जनकसुता तहँ रही ॥  
तब हनुमंत कहा सुनु भ्राता । देखी चहउँ जानकी माता ॥  
जुगुति बिभीषन सकल सुनाई । चलेउ पवनसुत बिदा कराई ॥  
करि सोइ रूप गयउ पुनि तहवाँ । बन असोक सीता रह जहवाँ ॥  
देखि मनहि महुँ कीन्ह प्रनामा । बैठेहिं बीति जात निसि जामा ॥  
कृस तनु सीस जटा एक बेनी । जपति हृदयँ रघुपति गुन श्रेनी ॥

ॐ निज पद नयन दिऐँ मन राम पद कमल लीन ।  
परम दुखी भा पवनसुत देखी जानकी दीन ॥ ८ ॥

चौ तरु पल्लव महुँ रहा लुकाई । करइ बिचार करौ का भाई ॥  
तेहि अवसर रावनु तहँ आवा । संग नारि बहु किएँ बनावा ॥  
बहु बिधि खल सीतहि समुझावा । साम दान भय भेद देखावा ॥  
कह रावनु सुनु सुमुखि सयानी । मंदोदरी आदि सब रानी ॥  
तव अनुचरी करउँ पन मोरा । एक बार बिलोकु मम ओरा ॥  
तृन धरि ओट कहति बैदेही । सुमिरि अवधपति परम सनेही ॥  
सुनु दसमुख खद्योत प्रकासा । कबहुँ कि नलिनी करइ बिकासा ॥  
अस मन समुझु कहति जानकी । खल सुधि नहिं रघुबीर बान की ॥  
सठ सूने हरि आनेहि मोही । अधम निलज्ज लाज नहिं तोही ॥

ॐ आपुहि सुनि खद्योत सम रामहि भानु समान ।  
पुरुष वचन सुनि काढ़ि असि बोला अति खिसिआन ॥ ९ ॥

चौ सीता तै मम कृत अपमाना । कटिहउँ सिर कठिन कृपाना ॥  
नाहि त सपदि मानु मम बानि । सुमुखि होति न त जीवन हानी ॥  
स्याम सरोज दाम समसुंदर । प्रभु भुज करि कर सम दसकंधर ॥  
सो भुज कंठ कि तव असि घोरा । सुनु सठ अस प्रवान पन मोरा ॥  
चंद्रहास हरु मम परितापं । रघुपति बिरह अनल संजातं ॥  
सीतल निसित बहसि बर धारा । कह सीता हरु मम दुख भारा ॥

सुनत बचन पुनि मारन धावा । मयतनयाँ कहि नीति बुझावा ॥  
कहेसि सकल निसिचरन्हि बोलाई । सीतहि बहु बिधि त्रासहु जाई ॥  
मास दिवस महुँ कहा न माना । तौ मै मारबि काढ़ि कृपाना ॥

ॐ भवन गयउ दसकंधर इहाँ पिसाचिनि बृंद ।  
सीतहि त्रास देखावहिं धरहिं रूप बहु मंद ॥ १० ॥

ॐ त्रिजटा नाम राच्छसी एका । राम चरन रति निपुन बिबेका ॥  
सबन्हौ बोलि सुनाएसि सपना । सीतहि सेइ करहु हित अपना ॥  
सपनें बानर लंका जारी । जातुधान सेना सब मारी ॥  
खर आरूढ नगन दससीसा । मुंडित सिर खंडित भुज बीसा ॥  
एहि बिधि सो दच्छिन दिसि जाई । लंका मनहुँ बिभीषन पाई ॥  
नगर फिरी रघुबीर दोहाई । तब प्रभु सीता बोलि पठाई ॥  
यह सपना मै कहउँ पुकारी । होइहि सत्य गएँ दिन चारी ॥  
तासु बचन सुनि ते सब डरीं । जनकसुता के चरनन्हि परीं ॥

ॐ जहँ तहँ गई सकल तब सीता कर मन सोच ।  
मास दिवस बीते मोहि मारिहि निसिचर पोच ॥ ११ ॥

ॐ त्रिजटा सन बोलीं कर जोरी । मातु बिपति संगिनि तै मोरी ॥  
तजौ देह करु बेगि उपाई । दुसह बिरहु अब नहिं सहि जाई ॥  
आनि काठ रचु चिता बनाई । मातु अनल पुनि देहि लगाई ॥  
सत्य करहि मम प्रीति सयानी । सुनै को श्रवन सूल सम बानी ॥  
सुनत बचन पद गइ समुझाएसि । प्रभु प्रताप बल सुजसु सुनाएसि ॥  
निसि न अनल मिल सुनु सुकुमारी । अस कहि सो निज भवन सिधारी ॥  
कह सीता बिधि भा प्रतिकूला । मिलिहि न पावक मिटिहि न सूला ॥  
देखि अत प्रगट गगन अंगारा । अग्नि न आवत एक उतारा ॥  
पावकमय ससि स्ववत न आगी । मानहुँ मोहि जानि हतभागी ॥  
सुनहि बिनय मम बिटप असोका । सत्य नाम करु हरु मम सोका ॥  
नूतन किसलय अनल समाना । देहि अग्नि जनि करहि निदाना ॥  
देखि परम बिरहाकुल सीता । सो छन कपिहि कल्प सम बैता ॥

सो कपि करि हृदय बिचार दीन्हि मुद्रिका डारि तब ।  
जनु असोक अंगार दीन्ह हरषि उठि कर गहेउ ॥ १२ ॥

तब देखी मुद्रिका मनोहर । राम नाम अंकित अति सुन्दर ॥  
चकित चितव मुदरी पहिचानी । हरष विषाद हृदयँ अकुलानी ॥  
जीति को सकइ अजय रघुराई । माया तें असि रचि नहि जाई ॥  
सीता मन बिचार कर नाना । मधुर बचन बोलेउ हनुमाना ॥  
रामचंद्र गुन बरनै लागा । सुनतहि सीता कर दुख भागा ॥  
लागीं सुनै श्रवन मन लाई । आदिहु ते सब कथा सुनाई ॥  
श्रवनामृत जेहि कथा सुहाई । कही सो प्रगट होति किन भाई ॥  
तब हनुमंत निकट चलि गयउ । फिरि बैठी मन बिसमय भयऊ ॥  
राम दूत मै मातु जानकी । सत्य सपथ करुनानिधान की ॥  
यह मुद्रिका मातु मै आनी । दीन्हि राम तुम्ह कह सहिदानी ॥  
नर बानर संग कहु कैसें । कही कथा भइ संगति जैसें ॥

सो कपि के बचन सप्रेम सुनि उपजा मन बिस्वास ।  
जाना मन क्रम बचन यह कृपासिंधु कर दास ॥ १३ ॥

सो हरिजन जानि प्रीति अति गाढी । सजल नयन पुलकावलि बाढी ॥  
बूडत बिरह जलधि हनुमाना । भयउ तात मो कहुँ जलजाना ॥  
अब कहु कुसल जाऊँ बलिहारी । अनुज सहित सुख भवन खरारी ॥  
कोमल चित कृपाल रघुराई । कपि केहि हेतु धरी निठुराई ॥  
सहज बानि सेवक सुखदायक । कबहुँक सुरति करत रघुनायक ॥  
कबहुँ नयन मम सीतल ताता । हडिहहि निरखि स्याम मृदु गाता ॥  
बचनु न आव नयन भरे बारी । अहह नाथ हौ निषट बिसारी ॥  
देखि परम बिरहाकुल सीता । बोला कपि मृदु बचन बिनीता ॥  
मातु कुसल प्रभु अनुज समेता । तव दुख दुखी सुकृपा निकेता ॥  
जनि जननी मान्हु जियँ ऊना । तुम्ह ते प्रेम राम केँ दूना ॥

सो रघुपति कर संदेसु अब सुनु जननी धरि धीर ।  
अस कहि कपि गदगद भयउ भरे बिलोचन नीर ॥ १४ ॥



ॐ कहेउ राम बियोग तब सीता । मो कहुँ सकल भए बिपरीता ॥  
नव तरु किसलय मनहुँ कृसानु । कालनिसा सम निसि ससि भानू ॥  
कुबलय बिपिन कुंत बन सरिसा । बरिद तपत तेल जनु बरिसा ॥  
जे हित रहे करत तेइ पीरा । उरग स्यास सम त्रिबिध समीरा ॥  
कहेहू तें कळु दुख घटि होई । काहि कहौ यह जान न कोई ॥  
तत्व प्रेम कर मम अरु तोरा । जानत प्रिया एकु मन मोरा ॥  
सो मनु सदा रहत तोहि पाही । जानु प्रीति रसु एतनेहि माही ॥  
प्रभु संदेसु सुनत बैदेही । मगन प्रेम तन सुधि नहिं तेही ॥  
कह कपि हृदय धीर धरु माता । सुमिरु राम सेवक सुखदाता ॥  
उर आनहु रघुपति प्रभुताई । सुनि मम बचन तजहु कदराई ॥

ॐ निसिचर निकर पतंग सम रघुपति बान कृसानु ।  
जननी हृदयँ धीर धरु जरे निसाचर जानु ॥ १५ ॥

ॐ जौ रघुबीर होति सुधि पाई । करते नहिं बिलंबु रघुराई ॥  
राम बान रबि उएँ जानकी । तम बरूथ कहँ जातुधान की ॥  
अबहि मातु मै जाउँ लवाई । प्रभु आयसु नहिं राम दोहाई ॥  
कळुक दिवस जननी धरु धीरा । कपिन्ह सहित अइहहिं रघुबीरा ॥  
निसिचर मारि तोहि लै जैहहिं । तिहुँ पुर नारगदि जसु गैहहिं ॥  
हैं सुत कपि सब तुम्हहि समाना । जातुधान अति भट बलवाना ॥  
मोरे हृदय परम संदेहा । सुनि कपि प्रगट कीन्हि निज देहा ॥  
कनक भूदराकार सरीरा । समर भयंकर अति बलबीरा ॥  
सीता मन भरोस तब भयऊ । पुनि लघु रूप पवनसुत लयऊ ॥

ॐ सुनु माता साखामृग नहिं बल बुद्धि बिसाल ।  
प्रभु प्रताप ते गरुढहि खाइ परम लघु ब्याल ॥ १६ ॥

ॐ मनसंतोष सुनत कपि बानी । भगति प्रताप तेज बल सानी ॥  
आसिष दीन्हि राम प्रिय जाना । होहु तात बलसील निधाना ॥  
अजर अमर गुननिधि सुत होहू । करहुँ बहुत रघुनायक छोहू ॥  
करहुँ कृपा प्रभु अस सुनि काना । निर्भर प्रेम मगन हनुमाना ॥

बार बार नाएसि पद सीसा । बोला बचन जोरि कर कीसा ॥  
अब कृतकृत्य भयउँ मै माता । आसिष तब अमोघ बिख्याता ॥  
सुनहु मातु मोहि अतिसय भूखा । लागि देखि सुंदर फल रूखा ॥  
सुनु सुत करहिं बिपिन रखवारी । परम सुभट रजनीचर भारी ॥  
तिन्ह कर भय माता मोहि नाहि । जौ तुम्ह सुख मानहु मन माहीं ॥

ॐ देखि बुद्धि बल निपुन कपि कहेउ जानकी जाहु ।  
रघुपति चरन हृदय धरि तात मधुर फल खाहू ॥ १७ ॥

ॐ चलेउ नाइ सिरु पैठेउ बागा । फल खाएसि तरु तोरै लागा ॥  
रहे तहाँ बहु भट रखवारे । कळु मारेसि कळु जाइ पुकारे ॥  
नाथ एक आवा कपि भारी । तेहिं असोक बाटिका उजारी ॥  
खाएसि फल अरु बिटप उपारे । रच्छक मर्दि मर्दि महि डारे ॥  
सुनि रावन पठए भट नाना । तिन्हहि देखि गर्जेउ हनुमाना ॥  
सब रजनीचर कपि संघारे । गए पुकारत कळु अधमारे ॥  
पुनि पठयउ तेहि अच्छकुमारा । चला संग लै सुभट अपारा ॥  
आवत देखि बिटप गहि तर्जा । ताहि निपाति महाधुनि गर्जा ॥

ॐ कळु मारेसि कळु मर्देसि कळु मिलएसि धरि धूरि ।  
कळु पुनि जाइ पुकारे प्रभु मर्कट बल भूरि ॥ १८ ॥

ॐ सुनि सुत बध लंकेस रिसाना । पठएसि मेघनाद बलवाना ॥  
मारसि जनि सुत बाँधेसु ताही । देखिअ कपिहि कहाँ कर आही ॥  
चला इंद्रजित अतुलित जोधा । बंधु निधन सुनि उपजा क्रोधा ॥  
कपि देखा दारुन भट आवा । कटकटाइ गर्जा अरु धावा ॥  
अति बिसाल तरु एक उपारा । बिरथ कीन्ह लंकेस कुमारा ॥  
रहे महाभट ताके संग्गा । गहि गहि कपि मर्दइ निज अंगा ॥  
तिन्हृहि निपाति ताहि सन बाजा । भिरे जुगल मानहु गजराजा ॥  
मुठिका मारि चढा तरु जाई । ताहि एक छन मुरछा आई ॥  
उठि बहोरि कीन्हिसि बहु माया । जीति न जाइ प्रभंजन जाया ॥

ॐ ब्रह्म अस्त्र तेहिं साँधा कपि मन कीन्ह बिचार ।  
जौ न ब्रह्मसर मानउँ महिमा मिटइ अपार ॥ १९ ॥

ॐ ब्रह्मबान कपि कहँ तहि मारा । परतिहुँ बार कटकु चंधारा ॥  
तेहिं देखा कपि मुरच्छित भयऊ । नागपास बाँधेसि लै गयऊ ॥  
जासु नाम जपि सुनहु भावानी । भव बंधन काटहिं नर ग्यानी ॥  
तासु दूत कि बंध तरु आवा । प्रभु कारज लागि कपिहिं बँधावा ॥  
कपि बंधन सुनि निसिचर धाए । कौतुक लागि सभाँ सब आए ॥  
दसमुख सभा दीखि कपि जाई । कहि न जाइ कहुँ अति प्रभुताई ॥  
कर जोरे सुर दिसिप बिनीता । भृकुटि बिलोकत सकल सभीता ॥  
देखि प्रताप न कपि मन संका । जिमि अहिगन महुँ गरुड असंका ॥

ॐ कपिहि बिलोकि दसानन बिहसा कहि दुर्बाद ।  
सुत बध सुरति कीन्हि पुनि उपजा हृदय बिषाद ॥ २० ॥

ॐ कह लंकेस कवन तै कीसा । केहि कें बल घालेहि बन खीसा ॥  
की धौ श्रवन सुनेहि नहि मोही । देखउँ अति असंक सठ तोहि ॥  
मारे निसिचर केहिं अपराधा । कहु सठ तोहि न प्रान कइ बाधा ॥  
सुनु रावन ब्रह्मांड निकाया । पाइ जासु बल बिरचित माया ॥  
जाकेँ बल बिरंचि हरि ईसा । पालत सृजत हरत दससीसा ॥  
जा बल सीस धरत सहसानन । अंडकोस समेत गिरि कानन ॥  
धरइ जो बिबिध देह सुरत्राता । तुम्ह से सठन्ह सिखावनु दाता ॥  
हर कोदंड कठिन जेहिं भंजा । तेहि समेत नृपु दल मद गंजा ॥  
खर दूषन त्रिसिरा अरु बाली । बधे सकल अतुलित बलसाली ॥

ॐ जाके बल लवलेस तें जितेहु चराचर झारि ।  
तासु दूत मै जा करि हरि आनेहु प्रिय नारि ॥ २१ ॥

ॐ जानेउँ मै तुम्हारि प्रभुताई । सहसबाहु सन परी लराई ॥  
समर बालि सन करि जसु पावा । सुनि कपि बचन बिहसि बिहरावा ॥  
खायउँ फल प्रभु लागी भूखा । कपि सुभाव तें तोरेउँ रूखा ॥

सब कें देह परम प्रिय स्वामी । मारहिं मोहि कुमारग गामी ॥  
जिन्ह मोहि मारा ते मै मारे । तेहि पर बाँधेउँ तनय तुम्हारे ॥  
मोहि न कछु बाँधे कड़ लाजा । कीन्ह चहउँ निज प्रभु कर काजा ॥  
बिनती करउँ जोरि कर रावन । सुनहु मान तजि मोर सिखावन ॥  
देखहु तुम्ह निज कुलहि बिचारी । भ्रम तजि भजहु भगत भय हारी ॥  
जाकें डर अति काल डेराई । जो सुर असुर चराचर खाई ॥  
तासों बयरु कबहुँ नहिं कीजै । मोरे कहें जानकी दीजै ॥

ॐ प्रनतपाल रघुनायक करुना सिंधु खरारि ।  
गएँ सरन प्रभु राखिहैं तव अपराध बिसारि ॥ २२ ॥

ॐ राम चरन पंकज उर धरहू । लंका अचल राजु तुम्ह करहू ॥  
रिषि पुलस्त जसु बिमल मयंका । तेहि ससि महुँ जनि होहु कलंका ॥  
राम नाम बिनु गिरा न सोहा । देखु बिचारि त्यागि मद मोहा ॥  
बसन हीन नहिं सोह सुरारी । सब भूषन भूषित बर नारी ॥  
राम बिमुख संपति प्रभुताई । जाइ रही पाई बिनु पाई ॥  
सजल मूल जिन्ह सरितन्ह नाहीं ॥ बरषि गएँ पुनि तबहि सुखाहीं ॥  
सुनु दसकंठ कहउँ पन रोपी । बिमुख राम त्राता नहिं कोपी ॥  
संकर सहस बिष्णु अज तोही । सकहिं न राखि राम कर द्रोही ॥

ॐ मोहमूल बहु सूल प्रद त्यागहु तम अभिमान ।  
भजहु राम रघुनायक कृपा सिंधु भगवान ॥ २३ ॥

ॐ जदपि कही कपि अति हित बानी । भगति बिबेक बिरति नय सानी ॥  
बोला बिहसि महा अभिमानी । मिला हमहि कपि गुर बड़ ग्यानी ॥  
मृत्यु निटक आई खल तोही । लागेसि अधम सिखावन मोही ॥  
उलटा होइहि कह हनुमाना । मतिभ्रम तोर प्रगट मै जाना ॥  
सुनि कपि बचन बहुत खिसिआना । बेगि न हरहुँ मूढ़ कर प्राणा ॥  
सुनत निसाचर मारन धाए । सचिवन्ह सहित बिभीषन आए ॥

नाइ सीस करि बिनय बहूता । नीति बिरोध न मारिअ दूता ॥  
आन दंड कळु करिअ गोसाँई । सबही कहा मंत्र भल भाई ॥  
सुनत बिहसि बोला दसकंधर । अंग भंग करि पठइअ बंदर ॥

ॐ कपि के ममता पूँछपर सबहि कहउं समुझाइ ।  
तेल बोरि पट बाँधि पुनि पावक देहु लगाइ ॥ २४ ॥

ॐ पूँछ हीन बानर तहँ जाइहि । तब सठ निज नाथहि लइ आइहि ॥  
जिन्ह कै कीन्हिसि बहुत बड़ाई । देखउं मैं तिन्ह कै प्रभुताई ॥  
बचन सुनत कपि मन मुसुकाना । भइ सहाय सारद मै जाना ॥  
जातुधान सुनि रावन बचना । लागें रचै मूढ सोइ रचना ॥  
रहा न नगर बसन घृत तेला । बाढी पूँछ कीन्ह कपि खेला ॥  
कौतुक कहँ आए पुरबासी । मारहिं चरन करहिं बहु हाँसी ॥  
बाजहिं ढोल देहिं सब तारी । नगर फेरि पुनि पूँछ प्रजारी ॥  
पावक जरत देखि हनुमंता । भयउ परम लघु रूप तुरंता ॥  
निबुकि चढेउ कपि कनक अटारी । भई सभित निसाचर नारी ॥

ॐ हरि प्रेरित तेहि अवसर चले मरुत उनचास ।  
अट्टहास करि गर्जा कपि बढि लाग अकास ॥ २५ ॥

ॐ देह बिसाल परम हरुआइ । मंदिर तें मंदिर चढ धाई ॥  
जरइ नगर भा लोग बिहाला । झपट लपट बहु कोटि कराला ॥  
तात मातु हा सुनिअ पुकारा । एहिं अवसर को हमहि उबारा ॥  
हम जो कहा यह कपि नहिं होई । बानर रूप धरें सुर कोई ॥  
साधु अवग्या कर फलु ऐसा । जरइ नगर अनाथ कर जैसा ॥  
जारा नगरु निमिष एक माहीं । एक बिभीषन कर गृह नाहीं ॥  
ता कर दूत अनल जेहिं सिरिजा । जरा न सो तेहि कारन गिरिजा ॥  
उलटि पलटि लंका सब जारी । कूदि परापुनि सिंधु मझारी ॥

ॐ पूँछ बुझाइ खोइ श्रम धरि लघु रूप बहोरि ।  
जनकसुता के आगे ठाढ भयउ कर जोरि ॥ २६ ॥

ॐ मातु मोहि दीजे कळु चीन्हा । जैसे रघुनायक मोहि दीन्हा ॥  
चूडामनि उतारि तब दयऊ । हरष समेत पवनसुत लयऊ ॥  
कहेहु तात अस मोर प्रनामा । सब प्रकार प्रभु पूरन कामा ॥  
दीन दयाल बिरिदु संभारी । हरहु नाथ मम संकट भारी ॥  
तात सक्रसुत कथा सुनाएहु । बान प्रताप प्रभुहि समुझाएहु ॥  
मास दिवस महुं नाथ न आवा । तौ पुनि मोहि जिअत नहिं पावा ॥  
कहु कपि केहि बिधि राखौ प्राणा । तुम्हू तात कहत अब जाना ।  
तोहि देखि सीतल भइ छाती । पुनि मो कहुं सोइ दिन सो राती ॥

ॐ जनक सुतहि समुझाइ करि बहु बिधि धीरजु दीन ।  
चरन कमल सिरु नाइ कपि गवनु राम पहिं कीन्ह ॥ २७ ॥

ॐ चलत महाधुनि गर्जेसि भारी । गर्भ ख्रवहिं सुनि निसिचर नारी ॥  
नाधि सिंधु एहि पारहि आवा । सबद किलिकिला कपिन्ह सुनावा ॥  
हरषे सब बिलोकि हनुमाना । नूतन जन्म कपिन्ह तब जाना ॥  
मुख प्रसन्न तन तेज बिराजा । कीन्हेसि रामचंद्र कर काजा ॥  
मिले सकल अति भए सुखारी । तलफत मीन पाव जिमि बारी ॥  
चले हरषि रघुनायक पासा । पूँछत कहत नवल इतिहासा ॥  
तब मधुबन भीतर सब आए । अंगद सम्मत मधु फल खाए ॥  
रखवारे जब बरजन लागे । मुष्टि प्रहार हनत सब भागे ॥

ॐ जाइ पुकारे ते सब बन उजार जुबराज ।  
सुनि सुग्रीव हरष कपि करि आए प्रभु काज ॥ २८ ॥

ॐ जौ न होति सीता सुधि पाई । मधुबन के फल सकहिं कि खाई ॥  
एहि बिधि मन बिचार कर राजा । आइ गए कपि सहित समाजा ॥  
आइ सबन्हि नावा पद सीसा । मिलेउ सबन्हि अति प्रेम कपीसा ॥  
पूँछी कुसल कुसल पद देखी । राम कृपा भा काजु बिसेषी ॥  
नाथ काजु कीन्हेउ हनुमाना । राखे सकल कपिन्ह के प्राणा ॥  
सुनि सुग्रीव बहुरि तेहि मिलेऊ । कपिन्ह सहित रघुपति पहिं चलेऊ ॥  
राम कपिन्ह जब आवत देखा । किए काजु मन हरष बिसेषा ॥

फटिक सिला बैठे द्वौ भाई । परे सकल कपि चरनन्हि जाई ॥

ॐ प्रीति सहित सब भेटे रघुपति करुना पुंज ।  
पूँछी कुसल नाथ अब कुसल देखि पद कंज ॥ २९ ॥

ॐ जामवंत कह सुनु रघुराया । जा पर नाथ करहु तुम दाया ॥  
ताहि सदा सुभ कुसल निरंतर । सुर नर मुनि प्रसन्न ता ऊपर ॥  
सोइ बिजई बिनई गुन सागर । तासु सुजसु त्रैलोक उजागर ॥  
प्रभु की कृपा भयउ सब काजू । जन्म हमार सुफल भा आजू ॥  
नाथ पवनसुत कीन्हि जो करनी । सहसहुँ मुख न जाइ सो बरनी ॥  
पवनतनय के चरित सुहाए । जामवंत रघुपतिहि सुनाए ॥  
सुनत कृपानिधि मन अति भाए । पुनि हनुमान हरषि हियँ लाए ॥  
कहहु तात केहि भाँति जानकी । रहति करति रच्छा स्वप्रान की ॥

ॐ नाम पाहरू दिवस निसि ध्यान तुम्हार कपाट ।  
लोचन निज पद जंत्रित जाहिँ प्रान केहिँ बाट ॥ ३० ॥

ॐ चलत मोहि चूडामनि दीन्ही । रघुपति हृदयँ लाइ सोइ लीन्ही ॥  
नाथ जुगल लोचन भरि बारी । बचन कहे कळु जनककुमारी ॥  
अनुज समेत गहेहु प्रभु चराना । दीन बंधु प्रनतारति हरना ॥  
मन क्रम बचन चरन अनुरागी । केहिँ अपराध नाथ हौ त्यागी ॥  
अवगुन एक मोर मै माना । बिछुरत प्रान न कीन्ह पयाना ॥  
नाथ सो नयनन्हि को अपराधा । निसरत प्रान करहिँ हठि बाधा ॥  
बिरह अगिनि तनु तूल समीरा । स्वास जरइ छन माहिँ सरीरा ॥  
नयन स्त्रवहि जलु निज हित लागी । जरै न पाव देह बिरहागी ॥  
सीता कै अति बिपति बिसाला । बिनहिँ कहेँ भलि दीनदयाला ॥

ॐ निमिष निमिष करुनानिधि जाहिँ कलप सम बीति ।  
बेगि चलिअ प्रभु आनिअ भुज बल खल दल जीति ॥ ३१ ॥

ॐ सुनि सीता दुख प्रभु सुख अयना । भरि आए जल राजिव नयना ॥  
बचन कायँ मन मम गति जाही । सपनेहु बूझिअ बिपति कि ताही ॥

कह हनुमंत बिपति प्रभु सोई । जब तव सुमिरन भजन न होई ॥  
केतिक बात प्रभु जातुधान की । रिपुहि जीति आनिबी जानकी ॥  
सुनु कपि तोहि समान उपकारी । नहि कोउ सुर नर मुनि तनुधारी ॥  
प्रति उपकार करौ का तोरा । सनमुख होइ न सकत मन मोरा ॥  
सुनु सुत तोहि उरिन मै नाही । देखेउँ करि बिचार मन माहीं ॥  
पुनि पुनि कपिहि चितव सुरत्राता । लोचन नीर पुलक अति गाता ॥

ॐ सुनि प्रभु बचन बिलोकि मुख गात हरषि हनुमंत ।  
चरन परेउ प्रेमाकुल त्राहि त्राहि भगवंत ॥ ३२ ॥

ॐ बार बार प्रभु चहइ उठावा । प्रेम मगन तेहि उठन न भावा ॥  
प्रभु कर पंकज कपि कें सीसा । सुमिरि सो दसा मगन गौरीसा ॥  
सावधान मन करि पुनि संकर । लागे कहन कथा अति सुंदर ॥  
कपि उठाइ प्रभु हृदय लगावा । कर गहि परम निकट बैठावा ॥  
कहु कपि रावन पालित लंका । केहि बिधि दहेउ दुर्ग अति बंका ॥  
प्रभु प्रसन्न जाना हनुमाना । बोला बचन बिगत अभिमाना ॥  
साखामृग कै बड़ि मनुसाई । साखा ते साखा पर जाई ॥  
नाधि सिंधु हाटकपुर जारा । निसिचर गन बधि बिपिन उजारा ॥  
सो सब तव प्रताप रघुराई । नाथ न कछू मोरि प्रभुताई ॥

ॐ ता कहूँ प्रभु कछु अगम नहिं जा पर तुम्ह अनुकूल ।  
तव प्रभावं बड़वानलहिं जारि सकइ खलु तूल ॥ ३३ ॥

ॐ नाथ भगति अति सुखदायनी । देहु कृपा करि अनपायनी ॥  
सुनि प्रभु परम सरल कपि बानी । एवमस्तु तब कहेइ भवानी ॥  
उमा राम सुभाउ जेहिं जाना । ताहि भजनु तजि भाव न आना ॥  
यह संबाद जासु उर आवा । रघुपति चरन भगति सोहि पावा ॥  
सुनि प्रभु बचन कहहिं कपिवृंदा । जय जय जय कृपाल सुखकंदा ॥  
तब रघुपति कपिपतिहि बोलावा । कहा चलै कर करहु बनावा ॥  
अब बिलंबु केहि कारन कीजे । तुरत कपिन्ह कहूँ आयसु दीजे ॥  
कौतुक देखि सुमन बहु बरषी । नभ तें भवन चले सुर हरषी ॥



ॐ कपिपति बेगि बोलाए आए जूथप जूथ ।  
नाना बरन अतुल बल बानर भालु बरूथ ॥ ३४ ॥

ॐ प्रभु पद पंकज नावहिं सीसा । गर्जहिं भालु महाबल कीसा ॥  
देखी राम सकल कपि सेना । चितइ कृपा करि राजिव नैना ॥  
राम कृपा बल पाइ कपिंदा । भए पच्छजुत मनहुं गिरिंदा ॥  
हरषि राम तब कीन्ह पयाना । सगुन भए सुंदर सुभ नाना ॥  
जासु सकल मंगलमय कीति । तासु पयान सगुन यह नीति ॥  
प्रभु पयान जाना बैदेही । फरकि बाम अंग जनु कहि देही ॥  
जोइ जोइ सगुन जानकिहि होई । असगुन भयउ रावनहि सोई ॥  
चला कटकु को बरनै पारा । गर्जहिं बानर भालु अपारा ॥  
नख आयुध गिरि पादपधारी । चले गगन महि इच्छाचारी ॥  
के हरिनाद भालु कपि करहीं । डगमगाहिं दिग्गज चिक्करहीं ॥

ॐ चिक्करहिं दिग्गज डोल महि गिरि लोल सागर खरभरे ।  
मन हरष सभ गंधर्व सुर मुनि नाग किंनर दुख टरे ॥  
कटकटहिं मर्कट बिकट भट बहु कोटि कोटिन्ह धावही ।  
जय राम प्रबल प्रताप कोसलनाथ गुन गन गावहीं ॥ १ ॥  
सहि सक न भार उदार अहिपति बार बारहिं मोहई ।  
गह दसन पुनि पुनि कमठ पृष्ट कठोर सो किमि सोहई ॥  
रघुबीर रुचिर प्रयान प्रस्थिति जानि परम सुहावनी ।  
जनु कमठ खर्पर सर्पराज सोलिखत अबिचल पावनी ॥ २ ॥

ॐ एहि बिधि जाइ कृपानिधि उतरे सागर तीर ।  
जहं तहं लागे खान फल भालु बिपुल कपि बीर ॥ ३५ ॥

ॐ उहाँ निसाचर रहहिं ससंका । जब ते जाँरि गयउ कपि लंका ॥  
निज निज गृह सब करहिं बिचारा । नहिं निसिचर कुल केर उबारा ॥  
जासु दूत बल बरनि न जाई । तेहि आएँ पुर कवन भलाई ॥  
दूतिन्ह सन सुनि पुरजन बानी । मंदोदरी अधिक अकुलानी ॥  
रहसि जोरि कर पति पग लागी । बोली बचन नीति रस पागी ॥

कंत करष हरि सन परिहरहू । मोर कहा अति हित हियँ धरहू ॥  
समुझत जासु दूत कइ करनी । स्त्रवहिं गर्भ रजनीचर घरनी ॥  
तासु नारि निज सचिव बोलाई । पठवहु कंत जो चहहु भलाई ॥  
तव कुल कमल बिपिन दुखदाई । सीता सीत निसा सम आई ॥  
सुनहु नाथ सीता बिनु दीन्हें । हित न तुम्हार संभु अज कीन्हें ॥

ॐ राम बान अहिं गन सरिस निकर निसाचर भेक ।  
जब लागि ग्रसत न तब लागि जतनु करहु तजि टेक ॥ ३६ ॥

ॐ श्रवन सुनी सठ ता करि बानी । बिहसा जगत बिदित अभिमानी ॥  
सभय सुभाउ नारि कर साचा । मंगल महुँ भय मन अति काचा ॥  
जौ आवइ मर्कट कटकाई । जिअहिं बिचारे निसिचर खाई ॥  
कंपहिं लोकप जाकी त्रासा । तासु नारि सभीत बड़ि हासा ॥  
अस कहि बिहसि ताहि उर लाई । चलेउ सभाँ ममता अधिकाई ॥  
मंदोदरी हृदय कर चिंता । भयउ कंत पर बिधि बिपरीता ॥  
बैठेउ सभा खबरि असिपाई । सिंधु पार सेना सब आई ॥  
बूझोसि सचिव उचित मत कहऊ । ते सब हँसे मष्ट करि रहहू ॥  
जितेहु सुरासुर तब श्रम नाही । नर बानर केहि लेखे माहीं ॥

ॐ सचिव वैद गुर तीनि जौ प्रिय बोलहिं भय आस ।  
राज धर्म तन तीनि कर होइ बेगिही नास ॥ ३७ ॥

ॐ सोइ रावन कहु बनी सहाई । अस्तुति करहिं सुनाइ सुनाई ॥  
अवसर जानि बिभीषनु आवा । भ्राता चरनु सीसु तेहिं नावा ॥  
पुनि सिरु नाइ बैठ निज आसन । बोला बचन पाइ अनुसासन ॥  
जौ कृपाल पूँछिहु मोहि बाता । मति अनुरूप कहउँ हित ताता ॥  
जो आपन चाहै कल्याना । सुजसु सुमति सुभ गति सुख नाना ॥  
सो परनारि लिलार गोसाई । तजउ चउथि के चंद कि नाई ॥  
चौदह भुवन एक पति होई । भूतद्रोह तिष्टइ नहिं सोई ॥  
गुन सागर नागर नर जोऊ । अलप लोभ भल कहइ न कोऊ ॥

ॐ काम क्रोध मद लोभ सब नाथ नरक के पंथ ।

सब परिहरि रघुबीरहि भजहु भजहिं जेहि संत ॥ ३८ ॥

ॐ तात राम नहिं नर भूपाला । भुवनेस्वर कालहु कर काला ॥  
ब्रह्म अनामय अज भगवंता । व्यापक अजित अनादि अनंता ॥  
गो द्विज धेनु देव हितकारी । कृपासिंधु मानुष तनु धारी ॥  
जन रंजन भंजन खल ब्राता । बेद धर्म रच्छक सुनु भ्राता ॥  
ताहि बयरु तजि नाइअ माथा । प्रनतारति भंजन रघुनाथा ॥  
देहु नाथ प्रभु कहुं बैदेही । भजहु राम बिनु हेतु सनेही ॥  
सरन गएँ प्रभु ताहु न त्यागा । बिस्व द्रोह कृत अघ जेहि लागा ॥  
जासु नाम त्रय ताप नसावन । सोइ प्रभु प्रगट समुझु जियँ रावन ॥

ॐ बार बार पद लागउँ बिनय करउँ दससीस ।  
परिहरि मान मोह मद भजहु कोसलाधीस ॥ ३९ (क)  
मुनि पुलस्ति निज सिष्य सन कहि पठई यह बात ।  
तुरत सो मै प्रभु सन कही पाइ सुअवसरु तात ॥ ३९ (ख)

ॐ माल्यवंत अति सचिव सयाना । तासु बचन सुनि अति सुख माना ॥  
तात अनुज तव नीति बिभूषन । सो उर धरउ जो कहत बिभीषन ॥  
रिपु उतकरष कहत सठ दोऊ । दूरि न करहु इहाँ हइ कोऊ ॥  
माल्यवंत गृह गयउ बहोरी । कहइ बिभीषनु पुनि कर जोरी ॥  
सुमति कुमति सब केँ उर रहहीं । नाथ पुरान निगम अस कहहीं ॥  
जहाँ सुमति तहाँ संपति नाना । जहाँ कुमति तहाँ बिपति निदाना ॥  
तव उर कुमति बसी बिपरीता । हित अनहित मानहु रिपु प्रीता ।  
कालराति निसिचर कुल केरी । तेहि सीता पर प्रीति घनेरी ॥

ॐ तात चरन गहि मागउँ राखहु मोर दुलार ।  
सीता देहु राम कहुं अहित न होइ तुम्हार ॥ ४० ॥

ॐ बुध पुरान श्रुति संमत बानी । कही बिभीषन नीति बखानी ॥  
सुनत दसानन उठा रिसाई । खल तोहि निकट मृत्यु अब आई ॥  
जिअसि सदा सठ मोर जिआवा । रिपु कर पच्छ मूढ तोहि भावा ॥  
कहसि न खल अस को जग माहीं । भुज बल जाहि जिता मै नाहीं ॥

मम पुर बसि तपसिन्ह पर प्रीती । सठ मिलु जाइ तिन्हहि कहु नीती ॥  
अस कहि कीन्हैसि चरन प्रहारा । अनुज गहे पद बारहि बारा ।  
उमा संत कइ इहइ बड़ाई । मंद करत जो करइ भलाई ॥  
तुम्ह पितु सरिस भलेहिं मोहि मारा । रामु भजें हित नाथ तुम्हारा ॥  
सचिव संग लै नभ पथ गयऊ । सबहि सुनाइ कहत अस भयऊ ॥

ॐ रामु सत्यसंकल्प प्रभु सभाकाल बस तोरि ।  
मै रघुबीर सरन अब जाउँ देहु जनिखोरि ॥ ४१ ॥

ॐ अस कहि चला बिभीषनु जबहीं । आयूहीन भए सब तबहीं ॥  
साधु अवग्या तुरत भवानी । कर कल्यान अखिल कै हानी ॥  
रावन जबहिं बिभीषन त्यागा । भयउ बिभय बिनु तबहिं अभागा ॥  
चलेउ हरष रघुनायक पाहीं । करत मनोरथ बहु मन माहीं ॥  
देखिहउँ जाइ चरन जलजाता । अरुन मृदुल सेवक सुखदाता ॥  
जे पद परसि तरी रिषिनारी । दंडक कानन पावनकारी ॥  
जे पद जनकसुताँ उर लाए । कपट कुरंग संग धर धाए ॥  
हर उर सर सरोज पद जेई । अहोभाग्य मै देखिहउँ तेई ॥

ॐ जिन्ह पायन्ह के पादुकन्हि भरतु रहे मन लाइ ।  
ते पद आजु बिलोकिहउँ इन्ह नयनन्हि अब जाइ ॥ ४२ ॥

ॐ एहि बिधि करत सप्रेम बिचारा । आयउ सपदि सिंधु एहि पारा ॥  
कपिन्ह बिभीषनु आवत देखा । जाना कोउ रिपु दूत बिसेषा ॥  
ताहि राखि कपीस पहि आए । समाचार सब ताहि सुनाए ॥  
कह सुग्रीव सुनहु रघुराई । आवा मिलन दसानन भाई ॥  
कह प्रभु सखा बूझि काहा । कहइ कपीस सुनहु नरनाहा ॥  
जानि न जाइ निसाचर माया । कामरूप केहि कारन आया ।  
भेद हमार लेन सठ आवा । राखिअ बाँधि मोहि अस भावा ॥  
सखा नीति तुम्ह नीकि बिचारी । मम पन सरनागत भयहारी ।  
सुनि प्रभु बचन हरष हनुमाना । सरनागत बच्छल भगवाना ॥

ॐ सरनागत कहूँ जे तजहिं निज अनहित अनुमानि ।

ते नर पावँर पापमय तिन्हहि बिलोकत हानि ॥ ४३ ॥

चौ कोटि बिप्र बध लागहि जाहू । आँ सरन तजउँ नहिं ताहू ॥  
सनमुख होइ जीव मोहि जबहीं । जन्म कोटि अब नासहिं तबहीं ॥  
पापवंत कर सहज सुभाऊ । भजनु मोर तेहि भाव न काऊ ॥  
जौ पै दुष्ट हृदय सोइ होई । मोरें सनमुख आव कि सोई ॥  
निर्मल मन जन सो मोहि पावा । मोहि कपट छल छिद्र न भावा ॥  
भेद लेन पठवा दससीसा । तबहु न कळु भय हानि कपीसा ॥  
झग महुँ सखा निसाचर जेते । लखिमनु हनइ निमिष महुँ तेते ॥  
जौ सभित आवा सरनाई । रखिहउँ ताहि प्राण की नाई ॥

बौ उभय भाँति तेहि आनहु हँसि कहु कृपानिकेत ।  
जय कृपाल कहि कपि चले अंगद हनू समेत ॥ ४४ ॥

चौ सादर तेहि आगे करि बानर । चले जहाँ रघुपति करुनाकर ॥  
दूरिहि ते देखे द्वौ भ्राता । नयनानंद दान के दाता ॥  
बहुरि राम छबिधाम बिलोकी । रहेउ ठटुकि एकटक पल रोकी ॥  
भुज प्रलंब कंजारुन लोचन । स्यामल गात प्रनत भय मोचन ।  
सिंघ कंध आयत उर सोहा । आनन अमित मदन मन मोहा ॥  
नयन नीर पुलकित अति गाता । मन धरि धीर कही मूढु बाता ॥  
नाथ दसानन कर मै भ्राता । निसिचर बंस जनम सुरत्राता ॥  
सहज पापप्रिय तामस देहा । जथा उलूकहि तम पर नेहा ॥

बौ श्रवन सुजसु सुनि आयउँ प्रभु भंजन भवभीर ।  
त्राहि त्राहि आरति हरन सरन सुखद रघुबीर ॥ ४५ ॥

चौ अस कहि करत दंडवत देखा । तुरत उठे प्रभु हरष बिसेषा ॥  
दीन बचन सुनि प्रभु मन भावा । भुज बिसाल गहि हृदय लगावा ॥  
अनुज सहित मिलि ढिग बैठारी । बोले बचन भगत भय हारी ॥  
कहु लंकेस सहित परिवारा । कुसल कुठाहर बास तुम्हारा ॥  
खल मंडली बसहु दिन राती । सखा धरम निबहइ केहि भाँती ॥  
मै जानउँ तुम्हार सब रीती । अति नय निपुन न भाव अनीती ॥

बहु भल बास नरक कर ताता । दुष्ट संग जनि देइ बिधाता ॥  
अब पद देखि कुसल रघुराया । जौ तुम्ह कीन्हि जानि जन दाया ॥

ॐ तब लागि कुसल न जीव कहूँ सपनेहुँ मन विश्राम ।  
जब लागि भजत न राम कहूँ सोक धाम तजि काम ॥ ४६ ॥

ॐ तब लागि हृदय बसत खल नाना । लौभ मोह मच्छर मध माना ॥  
जब लागि उर न बसत रघुनाथा । धरें चाप सायक कटि भाथा ॥  
ममता तरुन तमी अँधिआरी । राग द्वेष उलूक सुखकरी ॥  
तब लागि बसति जीव मन माही । जब लागि प्रभु प्रताप रबि नाहीं ॥  
अब मै कुसल मिटे भय भारे । देखि राम पद कमल तुम्हारे ॥  
तुम्ह कृपाल जा पर अनुकूला । ताहि न ब्याप त्रिबिध भव सूला ॥  
मै निसिचर अति अधम सुभाऊ । सुभ आचरनु कीन्ह नहिं काऊ ॥  
जासु रूप मुनि ध्यान न आवा । तेहिं प्रभु हरषि हृदय मोहि लावा ॥

ॐ अहोभाग्य मम अमित अति राम कृपा सुख पुंज ।  
देखेउँ नयन बिरंचि सिव सेव्य जुगल पद कंज ॥ ४७ ॥

ॐ सुनहु सखा निज कहउँ सुभाऊ । जान भुसुंढि संभु गिरिजाऊ ॥  
जौ नर होइ चराचर द्रोही । आवै सभय सरन तकि मोही ॥  
तजि मद मोह कपट छल नाना । करउँ सद्य तेहि साधु समाना ॥  
जननी जनक बंधु सुत दारा । तनु धनु भवन सहृद परिवारा ॥  
सब कै ममता ताग बटोरी । मम पद मनहि बाँध बरि डोरी ॥  
समदरसी इच्छा कछु नाहीं । हरष सोक भय नहिं मन माहीं ॥  
अस सज्जन मम उर बस कैसे । लोभी हृदय बसइ धनु जैसे ॥  
तुम्ह सारिखे संत प्रिय मोरें । धरउँ देह नहिं आन निहोरें ॥

ॐ सगुन उपासक परहित निरत नीति दृढ़ नेम ।  
ते नर प्रान समान मम जिन्ह कें द्विज पर प्रेम ॥ ४८ ॥

ॐ सुनु लंकेस सकल गुन तोरें । तातें तुम्ह अतिसय प्रिय मोरें ॥  
राम बचन सुनि बानर जूथा । सकल कहहिं जय कृपाबरूथा ॥

सुनत बिभीषनु प्रभु कै बानी । नहिं अघात श्रवनामृत जानी ॥  
पद अंबुज गहि बारहिं बारा । हृदयँ समात न प्रेमु अपारा ॥  
सुनहु देव सचराचर स्वामी । प्रनतपाल उर अंतरजामी ॥  
उर कळु प्रथम बासना रही । प्रभु पद प्रीति सरित सो बही ॥  
अब कृपाल निज भगति पावनी । देहु सदा सिव मन भावनी ॥  
एवमस्तु कहि प्रभु रनधीरा । मागा तुरत सिंधु कर नीरा ॥  
जदपि सखा तव इच्छा नाही । मोर दरसु अमोघ जग माही ॥  
अस कहि राम तिलक तेहि सारा । सुमन बृष्टि नभ भई अपारा ॥

ॐ रावन क्रोध अनल निज स्वास समीर प्रचंड ।  
जरत बिभीषनु राखेउ दीन्हेउ राजु अखंड ॥ ४९ (क) ॥  
जो संपति सिव रावनहि दीन्हि दिअँ दस माथ ।  
सोइ संपदा बिभीषनहि सकुचि दीन्हि रघुनाथ ॥ ४९ (ख) ॥

ॐ अस प्रभु छाडिं भजहिं जे आना । ते नर पसु बिनु पूँछ बिषाना ॥  
निज जन जानि ताहि अपनावा । प्रभु सुभाव कपि कुल मन भावा ॥  
पुनि सर्बग्य सर्ब उर बासी । सर्बरूप सब रहित उदासी ॥  
बोले बचन नीति प्रतिपालक । कारन मनुज दनुज कुल घालक ॥  
सुनु कपीस लंकापति बीरा । केहि बिधि तरिअ जलधि गंभीरा ॥  
संकुल मकर उरग झष जाती । अति अगाध दुस्तर सब भाँती ॥  
कह लंकेस सुनहु रघुनायक । कोटि सिंधु सोषक तव सायक ॥  
जद्यपि तदपि नीति असि गाई । बिनय करिअ सागर सन जाई ॥

ॐ प्रभु तुम्हार कुलगुर जलधि कहिहि उपाय बिचारि ।  
बिनु प्रयास सागर तरिहि सकल भालु कपि धारि ॥ ५० ॥

ॐ सखा कही तुम्ह नीकि उपाई । करिअ दैव जौ होइ सहाई ॥  
मंत्र न यह लच्छिमन मन भावा । राम बचन सुनि अति दुख पावा ॥  
नाथ दैव कर कवन भरोसा । सोषिअ सिंधु करिअ मन रोसा ॥  
कादर मन कहुँ एक अधारा । दैव दैव आलसी पुकारा ॥  
सुनत बिहसि बोले रघुबीरा । ऐसेहि करब धरहु मन धीरा ॥

अस कहि प्रभु अनुजहि समुझाई । सिंधु समीप गए रघुराई ॥  
प्रथम प्रनाम कीन्ह सिरु नाई । बैठे पुनि तट दर्भ डसाई ॥  
जबहिं बिभीषन प्रभु पहिं आए । पाछें रावन दूत पठाए ॥

ॐ सकल चरित तिन्ह देखे धरें कपट कपि देह ।  
प्रभु गुन हृदयँ सराहहिं सरनागत पर नेह ॥ ५१ ॥

ॐ प्रगट बखानहिं राम सुभाऊ । अति स प्रेम गा बिसरि दुराऊ ॥  
रिपु के दूत कपिन्ह तब जाने । सकल बाँधि कपीस पहिं आने ॥  
कह सुनहु सब बानर । अंग भंग करि पठवहु निसिचर ॥  
सुनि सुग्रीव बचन कपि धाए । बाँधि कटक चहु पास फिराए ॥  
बहु प्रकार मारन कपि लागे । दीन पुकारत तदपि न त्यागे ॥  
जो हमार हर नासा काना । तेहि कोसलाधीस कै आना ॥  
सुनि लछिमन सब निकट बोलाए । दया लागि हँसि तुरत छोड़ाए ॥  
रावन कर दीजहु यह पाती । लछिमन बचन बाचु कुलघाती ॥

ॐ कहेहु मुखागर मूढ सन मम संदेसु उदार ।  
सीता देइ मिलहु न त आवा कालु तुम्हार ॥ ५२ ॥

ॐ तुरत नाइ लछिमन पद माथा । चले दूत बरनत गुन गाथा ॥  
कहत राम जसु लंकाँ आए । रावन चरन सीस तिन्ह नाए ॥  
बिहसि दसानन पूँछी बाता । कहसि न सुक आपनि कुसलाता ॥  
पुनि कहु खबरि बिभीषन केरी । जाहि मृत्यु आई अति नेरी ॥  
करत राज लंका सठ त्यागी । होइहि जव कर कीट अभागी ॥  
पुनि कहु भालु कीस कटकाई । कठिन काल प्रेरित चलि आई ॥  
जिन्ह के जीवन कर रखवारा । भयउ मूढुल चित सिंधु बिचारा ।  
कहु तपसिन्ह कै बात बहोरी । जिन्ह के हृदयँ त्रास अति मोरी ॥

ॐ की भइ भेंट कि फिरि गए श्रवन सुजसु सुनि मोर ।  
कहसि न रिपु दल तेज बल बहुत चकित चित तोर ॥ ५३ ॥

ॐ नाथ कृपा करि पूँछेहु जैसे । मानहु कहा क्रोध तजि तैसे ॥



मिला जाइ जब अनुज तुम्हारा । जातहिं राम तिलक तेहि सारा ॥  
रावन दूत हमहि सुनि काना । कपिन्ह बाँधि दीन्हे दुख नाना ॥  
श्रवन नासिका काटै लागे । राम सपथ दीन्हें हम त्यागे ॥  
पूँछिहु नाथ राम कटकाई । बदन कोटि सत बरनि न जाई ॥  
नाना बरन भालु कपि धारी । बिकटानन बिसाल भयकारी ॥  
जेहिं पुर दहेउ हतेउ सुत तोरा । सकल कपिन्ह महँ तेहि बल थोरा ॥  
अमित नाम भट कठिन कराला । अमित नाम बल बिपुल बिसाला ॥

ॐ द्विबिद मयंद नील नल अंगद गद बिकटासि ।  
दधिमुख केहरि निसठ सठ जामवंत बलरासि ॥ ५४ ॥

ॐ ए कपि सब सुग्रीव समाना । इन सम कोटिन्ह गनइ को नाना ॥  
राम कृपा अतुलित बल तिन्हहीं । तृन समान त्रैलोकहि गनहीं ॥  
अस मै सुना श्रवन दसकंधर । पदुम अठारह जूथप बंदर ॥  
नाथ कटक महँ सो कपि नाही । जो न तुम्हहि जीतै रन माहीं ॥  
परम क्रोध मीजहिं सब हाथा । आयसु पै न देहिं रघुनाथा ॥  
सोषहि सिंधु सहित झष ब्याला । पुरहि न त भरि कुधर बिसाला ॥  
मर्दि गर्दि मिलवहिं दससीसा । ऐसेइ बचन कहहिं सब कीसा ॥  
गर्जहिं तर्जहिं सहज असंका । मानहुँ ग्रसन चहत हहिं लंका ॥

ॐ सहज सूर कपि भालु सब पुनि सिर पर प्रभु राम ।  
रावन काल कोटि कहुँ जीति सकहिं संग्राम ॥ ५५ ॥

ॐ राम तेज बल बुधि बिपुलाई । सेष सहस सत सकहिं न गाई ॥  
सक सर एक सोषि सत सागर । तव भ्रातहि पूँछेउ नय नागर ॥  
तासु बचन सुनि सागर पाहीं । मागत पंथ कृपा मन माहीं ॥  
सुनत बचन बिहसा दससीसा । जौ असि मति सहाय कृत कीसा ॥  
सहज भीरु कर बचन दृढाई । सागर सन ठानी मचलाई ॥  
मूढ मृषा का करसि बडौई । रिपु बल बुद्धि थाह मै पाई ॥  
सचिव समीत बिभीषन जाके । बिजय बिभूति कहाँ जग ताके ॥  
सुनि खल बचन दूत रिस बाढी । समय बिचारि पत्रिका काढी ॥

रामानुज दीन्ही यह पाती । नाथ बचाइ जुडावहु छाती ॥  
बिहसि बाम कर लीन्ही रावन । सचिव बोलि सठ लाग बचावन ॥

ॐ बातन्ह मनहि रिझाइ सठ जनि घालसि कुल खीस ।  
राम बिरोध न उबरसि सरन बिष्णु अज ईस ॥ ५६ (क) ॥  
की तजि मान अनुज इव प्रभु पद पंकज भृंग ।  
होहि कि राम सरानल खल कुल सहित पतंग ॥ ५६ (ख) ॥

ॐ सुनत सभय मन मुख मुसुकाई । कहत दसानन सबहि सुनाई ॥  
भूमि परा कर गहत अकासा । लघु तापस कर बाग बिलासा ॥  
कह सुक नाथ सत्य सब बानी । समुझहु छाड़ि प्रकृति अभिमानी ॥  
सुनहु बचन मम परिहरि क्रोधा । नाथ राम सन तजहु बिरोधा ॥  
अति कोमल रघुबीर सुभाऊ । जद्यपि अखिल लोक कर राऊ ॥  
मिलत कृपा तुम्ह पर प्रभु करिही । उर अपराध न एकउ धरिही ॥  
जनकसुता रघुनाथहि दीजे । एतना कहा मोर प्रभु कीजे ।  
जब तेहिं कहा देन बैदेही । चरन प्रहार कीन्ह सठ तेही ॥  
नाइ चरन सिरु चला सो तहाँ । कृपासिंधु रघुनायक जहाँ ॥  
करि प्रनामु निज कथा सुनाई । राम कृपा आपनि गति पाई ॥  
रिषि अगस्ति की साप भवानी । राखस भयउ रहा मुनि ग्यानी ॥  
बंदि राम पद बारहिं बारा । मुनि निज आश्रम कहूँ पगु धारा ॥

बिनय न मानत जलधि जडै गए तीनि दिन बीति ।  
बोले राम सकोप तब भय बिनु होइ न प्रीति ॥ ५७ ॥

लछिमन बान सरासर आनु । सोषौ बारिधि बिसिख कृसानू ॥  
सठ सन बिनय कुटिल सन प्रीती । सहज कृपन सन सुंदर नीती ॥  
ममता रत सन ग्यान कहानी । अति लोभी सन बिरति बखानी ॥  
क्रोधिहि सम कामिहि हरि कथा । ऊसर बीज बएँ फल जथा ॥  
अस कहि रघुपति चाप चढावा । यह मत लछिमन के मन भावा ॥  
संधानेउ प्रभु बिसिख कराला । उठी उदधि उर अंतर ज्वाला ॥  
मकर उरग झष गन अकुलाने । जरत जंतु जलनिधि जब जाने ॥

कनक थार भरि मनि गन नाना । बिप्र रूप आयउ तजि माना ।

काटेहिं पइ कदरी फरइ कोटि जतन कोउ सींच ।

बिनय न मान खगेस सुनु डाटेहिं पइ नव नीच ॥ ५८ ॥

सभय सिंधु गहि पद प्रभु केरे । छमहु नाथ सब अवगुन मेरे ॥

गगन समीर अनल जल धरनी । इन्ह कइ नाथ सहज जड़ करनी ॥

तव प्रेरित मायाँ उपजाए । सृष्टि हेतु सब ग्रंथनि गाए ॥

प्रभु आयसु जेहि कहँ जसअहई । सो तेहि भाँति रहँ सुख लहई ॥

प्रभु भल कीन्ह मोहि सिख दीनी । मरजादा पुनि तुम्हरी कीन्ही ॥

ढोल गवाँर सूद्र पसु नारि । सकल ताड़ना के अधिकारी ॥

प्रभु प्रताप मै जाब सुखाई । उतरिहि कटकु न मोरि बड़ाई ॥

प्रभु अग्या अपेल श्रुति गाई । करौ सो बेगि जो तुम्हहि सुहाई ॥

सुनत बिनीत बचन अति कह कृपाल मुसुकाइ ।

जेहि बिधि उतरे कपि कटकु तात सो कहहु उपाइ ॥ ५९ ॥

नाथ नील नल कपि द्वौ भाई । लरिकई रिषि आसिष पाई ।

तिन्ह के परस किएँ गिरि भारे । तरिहहिं जलधि प्रताप तुम्हारे ।

मै पुनि उर धरि प्रभु प्रभुताई । करिहउँ बल अनुमान सहाई ॥

एहि बिधि नाथ पयोधि बँधाइअ । जेहिं यह सुजसु लोक तिहुँ गाइअ ॥

एहिं सर मम उत्तर तट बासी । हतहु नाथ खल नर अघ रासी ॥

सुनि कृपाल सागर मन पीरा । तुरतहिं हरी राम रनधीरा ॥

देखिहि राम बल पौरुष भारी । हरषि पयोनिधि भयउ सुखारी ॥

सकल चरित कहि प्रभुहि सुनावा । चरन बंदि पाथोधि सिधावा ॥

७ निज भवन गवनेउ सिंधु श्रीरघुपतिहि यह मत भायऊ ।

यह चरित कलि मलहर जथामति दास तुलसी गायऊ ॥

सुख भवन संसय समन दवन विषाद रघुपति गुन गना ।

तजि सकल आस भरोस गावहि सुनहि संतत सठ मना ॥

सकल सुमंगल दायक रघुनायक गुन गान ।

सादर सुनहि ते तरहिं भव सिंधु बिना जल जान ॥ ६० ॥

## हनुमान चालीसा

श्री गुरु चरन सरोज रज निज मन मुकुरु सुधारि ।  
भरनउँ रघुवर बिमल जसु जो दायकु फल चारि ॥  
बुद्धिहीन तनु जानिके सुमिरौ पवन कुमार ।  
बल बुधि बिद्या देहु मोहिं हरहु कलेस बिकार ॥

जय हनुमान ज्ञान गुन सागर । जय कपीस तिहुँ लोक उजागर ॥  
राम दूत अतुलित बलधामा । अंजनि-पुत्र पवनसुत नामा ॥  
महावीर बिक्रम बजरंगी । कुमति निवार सुमति के संगी ॥  
कंचन बरन बिराज सुबेसा । कानन कुंडल कुंचित केसा ॥  
हाथ बज्र अरु ध्वजा बिराजै । काँधे मूँज जनेउ साजै ॥  
संकर सुवन केसरीनंदन । तेज प्रताप महा जग बंदन ॥  
बिद्यावान गुनी अति चातुर । राम काज करिबे को आतुर ॥  
प्रभु चरित्र सुनिबे को रसिया । राम लखन सीता मन बसिया ॥  
सूक्ष्म रूप धरि सियहिं दिखावा । बिकट रूप धरि लंक जरावा ॥  
भीम रूप धरि असुर संहारे । रामचंद्र के काज सँवारे ॥  
लाय सजीवन लखन जियाये । श्री रघुबीर हरषि उर लाए ॥  
रघुपति कीन्ही बहुत बडौई । तुम मम प्रिय भरतहिं सम भाई ॥  
सहस बदन तुम्हरो जस गावैं । अस कहि श्रीपति कंठ लगावैं ॥  
सनकादिक ब्रह्मादि मुनीसा । नारदा सारद सहित अहीसा ॥  
जम कुबेर दिगपाल जहाँ ते । कबि कोबिद कहि सके कहाँ ते ॥  
तुम उपकार सुग्रीवहिं कीन्हा । राम मिलाय राज पद दीन्हा ॥  
तुम्हरो मंत्र बिभीषन माना । लंकेस्वर भए सब जग जाना ॥  
जुग सहस्र जोजन पर भानू । लील्यो ताहि मधुर फल जानू ॥  
प्रभु मुद्रिका मेलि मुख माहीं । जलधि लाँघि गये अचरज नाहीं ॥  
दुर्गम काज जगत के जेते । सुगम अनुग्रह तुम्हरे तेते ॥  
राम दुआरे तुम रखवारे । होत न आज्ञा बिनु पैसारे ॥  
सब सुख लहै तम्हारी सरना । तुम रच्छक काहू को डरना ॥

आपन तेज सम्हारो आपै । तीनों लोक हाँक तें काँपै ॥  
 भूत पिसाच निकट नहिं आवै । महाबीर जब नाम सुनावै ॥  
 नासै रोग हरै सब पीरा । जपत निरंतर हनुमत बीरा ॥  
 संकट ते हनुमान छुड़ावै । मन क्रम बचन ध्यान जो लावै ॥  
 सब पर राम तपस्वी राजा । तिनके काज सकल तुम साजा ॥  
 और मनोरथ जो कोइ लावै । सोइ अमित जीवन फल पावै ॥  
 चारों जुग परताप तुम्हारा । है परसिद्ध जगत उजियारा ॥  
 साधु संत के तुम रखवारे । असुर निकंदन राम दुलारे ॥  
 अष्ट सिद्धि नवनिधि के दाता । अस बर दीन जानकी माता ॥  
 राम रसायन तुम्हरे पास । सदा रहो रघुपति के दासा ॥  
 तुम्हरे भजन राम को पावै ॥ जनम जनम के दुख बिसरावै ॥  
 अंत काल रघुबर पुर जाई । जहाँ जन्म हरि भक्त कहाई ॥  
 और देवता चित्त न धरइ । हनुमत सेइ सर्व सुख करई ॥  
 संकट कटै मिटै सब पीरा । जो सुमिरै हनुमत बलबीरा ॥  
 जै जै जै हनुमान गोसाई । कृपा करहु गुरु देव की नाई ॥  
 जो सत बार पाठ कर कोई । छूटहि बंदि महा सुख होई ॥  
 जो यह पढ़ै हनुमान चलीसा । होय सिद्धि साखी गौरीसा ॥  
 तुलसीदास सदा हरि चेरा । कीजै नाथ हृदय महँ डेरा ॥

पवन तनय संकट हरन मंगल मूरति रूप ।  
 राम लखन सीता सहित हृदय बसहु सुर भूप ॥

बाल समय रबि भक्षि लियो तब तीनहुँ लोक भयो अँधियारो ।  
 ताहि सों त्रास भयो जग को यह संकट काहु सों जात न टारो ॥  
 देवन आनि करी बिनती तब छाँड़ि दियो रबि कष्ट निवारो ।  
 को नहिं जानत है जगमें कपि संकटमोचन नाम तिहारो ॥ १ ॥  
 बालि की त्रास कपिस बसै गिरि जात महाप्रभु पंथ निहारो ।  
 चौंकि महामुनि साप दियो तब चाहिय कौन बिचार बिचारो ॥  
 कै द्विज रूप लिवाय महाप्रभु सो तुम दास के सोक निवारो ।  
 को नहिं जानत है जगमें कपि संकटमोचन नाम तिहारो ॥ २ ॥

आंगद के संग लेन गए सिय खोज कपीस यह बैन उचारो ।  
जीवत ना बचिहौ हाम सो जु बिना सुधि लाए इहाँ पगु धारो ॥  
हेरि थके तट सिंधु सबै तब लाय सिया-सुधि प्रान उबारो ।  
को नहिं जानत है जगमें कपि संकटमोचन नाम तिहारो ॥ ३ ॥  
रावन त्रास दई सिय को सब राक्षसि सों कहि सोक निवारो ।  
ताहि समय हनुमान महाप्रभ जाय महा रजनीचर मारो ॥  
चाहत सीय असोक सों आगि सु दै प्रभु मुद्रिका सोक निवारो ।  
को नहिं जानत है जगमें कपि संकटमोचन नाम तिहारो ॥ ४ ॥  
बान लग्यो उर लछिमन के तब प्रान तजे सुत रावन मारो ।  
लै गृह बैद्य सुषेन समेत तबै गिरि द्रोण सु बीर उपारो ॥  
आनि सजीवन हाथ दई तब लछिमन के तुम प्रान उबारो ।  
को नहिं जानत है जगमें कपि संकटमोचन नाम तिहारो ॥ ५ ॥  
रावन जुद्ध अजान कियो तब नाग कि फाँस सबै सिर डारो ।  
श्रीरघुनाथ समेत सबै दल मोह भयो यह संकट भारो ॥  
एनि खगेस तबै हनुमान जु बंधन काटि सुत्रास निवारो ।  
को नहिं जानत है जगमें कपि संकटमोचन नाम तिहारो ॥ ६ ॥  
बंधु समेत जबै अहिरावन लै रघुनाथ पताल सिधारो ।  
देबिहि पूजि भली बिधि सों बलि देउ सबै मिलि मंत्र बिचारो ॥  
जाय सहाय भयो तब ही अहिरावन सैन्य समेत संहारो ।  
को नहिं जानत है जगमें कपि संकटमोचन नाम तिहारो ॥ ७ ॥  
काज किये बड़ देवन के तुम बीर महाप्रभु देखि बिचारो ।  
कौन सो संकट मोर गरीब को जो तुमसों नहिं जात है टारो ।  
बेगि हरो हनुमान महाप्रभु जो कुछ संकट होय हमारो ॥  
को नहिं जानत है जगमें कपि संकटमोचन नाम तिहारो ॥ ८ ॥

लाल देह लाली लसे अरु धरि लाल लंगूर ।  
बज्र देह दानव दलन जय जय जय कपि सूर ॥

## श्री रामायणजी की आरती

आरति श्री रामायणजी की । कीरति कलित ललित सिय पी की ॥  
गावत ब्रह्मादिक मुनि नारद । बालमी बिग्यान बिसारद ॥  
सक सनकादि सेष अरु सारद । बरनि पवनसुत कीरति नीकी ॥ १ ॥  
आरति श्री रामायणजी की ।  
गावत वेद पुरान अष्टदस । छओ सास्त्र सब ग्रंथन को रस ॥  
मुनि जन धन संतन को सरबस । सार अंस संमत सबही की ॥ २ ॥  
आरति श्री रामायणजी की ।  
गावत संतत संभु भवानी । अरु घट संभव मुनि बिग्यानी ॥  
ब्यास आदि कबिबर्ज बखानी । काग भुसुंड़ि गरुड़ के ही की ॥ ३ ॥  
आरति श्री रामायणजी की ।  
कलि मल हरति विषय रस फीकी । सुभग सिंगार मुक्ति जुबती की ॥  
दलन रोग भव मूरि अमी की । तात मात सब बिधि तुलसी की ॥ ४ ॥  
आरति श्री रामायणजी की ।